

雲笈七籤

雲笈七籤卷之五十一

職一

宋 張君房 輯

明 張萱 訂

祕要訣法

行持事要

八道命籍

八道命籍一名八間一名八達一名八解纏綿釋結
謝罪延福妙經太素三元君受於自然之章封於太
上靈都紫房之內金章玉華三百人侍衛典香東海
小童四極真人西城王君封於峨嵋之山西室之中

萬劫一傳有玄名帝簡紫字青宮玉藏之人千年之
內聽得三傳上學之子不得此文虛困山林終不得
道所謂八道者日月四時八節所行也日行赤道月
行黃道黃赤二道陰陽之所恒行至於立春春分日
月行青道二出黃道東立夏夏至日月行赤道二出黃道南立
秋秋分日月行白道二出黃道西立冬冬至日月行黑道
二出黃道北此八道也日月行八道之日各有變化翺飛
蠕動含炁之流艸木飛沉隨緣感應改故易新輕者
或更重重者或更輕善惡回換炁象之運自然而然

上學真人因變行化習吉除凶進善黜惡申明棄闇
入正治邪練偽成真厲思登聖其法高妙茲道通玄
故曰八達至極無窮矣

一道命籍立春清朝北望有紫綠白雲者是太上三
元君三素飛雲也正存之叩頭搏頰各九心禮四拜
再密呪曰曾孫名今日幸遇三元君出行願得長生
侍給輪轂餘所言隨人意也某病乞差某厄乞度某
災乞消某事乞果三見雲輦白日昇仙不須復存思
千百所施爲行此必有仙錄是故謂之八道命籍也

二道命籍春分夜半子時東北望有玄青黃雲是太微天帝君三素雲也存思密呪皆如上法

三道命籍立夏清旦北望有紫青黃雲者是太極上

真君三元內宮真人三素雲也存思密呪皆如上法

四道命籍夏至清旦南望有赤白青雲者是扶桑大帝君三素雲也存禮密呪皆如上法

五道命籍立秋清旦正西望有白赤紫雲者是太素真人天皇白帝君三素雲也存禮密呪皆如上法

六道命籍秋分清旦南望有素赤黃雲者是南極真

人上皇赤帝三素雲也存禮密呪皆如上法

七道命籍立冬清旦西南望有綠紫青雲者是上清真人帝君皇祖三素雲也存禮密呪皆如上法

八道命籍冬至清旦正東望有朱碧黃雲者是太霄玉妃太虛上真人三素雲也存禮密呪皆如上法

右八道命籍之日月未至一二日先沐浴燒香以待至日依時出望一食頃還室陰雨則不望非其日忽見此雲禮呪如上三倍勝於其日也凡先身今身前世今世罪結不除謾謝不得原恕賒遲功行難進魔

清直齋書目卷之五十一
試不知多致退落衰老易至求昇難期一去長夜幽
苦未央上學之士悟此驚心誓志感玄徹靈能得命
籍的斷罪根解釋惡結滋長善源群邪不敢干得真
必速諦念密修卽有驗矣

八道祕書

閑心靜室寥朗虛真逸想妙觀騰躍玄人苟誠感上
會精悟輝晨亦將得見丹景之炁三素飛雲八輿朱
輦紫霞瓊輪上清淨眇徊轡三元高皇秉節靈童攀
轅太素擁蓋南極臨軒於是冥光外映濛蔚龍顏象

燭太虛流逸七觀也子能見之則白日昇晨不煩疑
霜濯華玄映金丹矣

一道祕言曰以八節日清朝北望有紫綠白雲者是
爲三元君三素雲也其時三元君乘八輪之輿上詣
天帝子候見之當再拜自陳乞得侍給輪轂之祝矣
三見元君輦者則白日昇仙

二道祕言曰以八節日夜半東北望有玄青黃雲者
是爲太微天帝君三素雲也其時太微天帝君乘八
景之輿上詣高上玉皇也四見天帝之輿者則白日

有龍輿見迎而昇天也

三道祕言曰以甲子上旬戊辰巳巳之日清旦西北望有紫青黃雲者是爲太極真君真人三素雲也其時太極真君太極真人乘玄景綠輿上詣紫微宮九見太極輿者則白日昇仙

四道祕言曰以甲戌上旬戊寅巳卯之日清旦東北望有赤白青雲者是爲扶桑大帝君三素雲也其時扶桑公大帝君非光明八道之輦上詣太微宮七見之者則白日有雲龍見迎而昇天也

五道祕言曰以甲申上旬戊子巳丑之日清旦正西
望見白赤紫雲者是爲太素上真白帝君三素雲也
其時太素上真人白帝君乘脩條玉輦上詣玉天玄
皇高真也十四過見之則白日昇仙

六道祕言曰以甲午上旬戊戌巳亥之日清旦正南
望有素赤黃雲者是爲南極上真赤帝君三素雲也
是時南極上真赤帝君乘絳琳碧輦上詣閼風臺十
過見之則白日昇仙

七道祕言曰以甲辰上旬戊申巳酉之日清旦西南

望見綠紫青雲者是爲上清真人三素雲也其時上
清真人乘玄景八光丹輦上詣高上九天帝君四見
之者則大一來迎白日昇仙

八道祕言曰以甲寅上旬戊午巳未之日清旦正東
望有朱碧黃雲者是爲太虛上真人三素雲也其時
太虛上乘人乘徘徊玉輦上詣太微天帝君十五見
之者則白日昇仙

右八道祕言見者當再拜自陳如上法三素雲各自
有色色氣上下相沓積如所次說也假令八節日見

三元三素雲者則紫雲在上綠雲次之白雲在下共相沓也子謹視之上旬者謂甲子之日初入月上十日之內有甲子日是也非其時日而見此雲者亦當拜祝則三倍於其日見也他日效於甲子矣行九真司八道之事者則天人衛護真皇守其命骨矣夫非有仙名玉籍者亦不能遇此經見之者皆玄書宿名應爲仙人故也七百年內聽得三傳施行此道者勿令人犯其履屐弄其巾褐也七鬼變成龍虎守人地關伏於屐履之下三鬼化成靈光之雲映其巾中若

有犯之者則心震意惕惕然自失所以神虧氣散精
光翳滯也常慎之侍書有玉童玉女各七人言白有
經者之功過攝萬邪之不祥若子視文皆燒香於左
右面也傳授之時對齋四日立誓委盟爲不漏不宣
之約須得其人然後乃可付耳違科負盟七祖父母
受拷於玄都地獄身死下鬼如四極明科太虛真人
南嶽赤松子曰此經或名九素上書或名太極中真
玉文或名八道金策按四極明科受書皆立誓約盟
不傳泄以代歃血割髮之信驗也其受九真太上真

文跪白素九十尺其受八道祕言黃老隱法跪素絲
八兩其受太上鎮生五藏雲腴之法跪金縱容珠二
枚以爲閉密之誓若有違盟泄露如神州四極法晉
永和七年歲在辛亥十月四日丁巳夜受劉君九真
中經八道祕言齋盟如法

太上曲素五行祕符

太上告後聖金闕帝君曰太上五行祕文與天地同
生混仙萬真總御神靈天無五行則三光不明地無
五行則山崩嶽傾人無五行則身朽零故五行混合

清真宮藏書之金 卷之五
相須而生若有志心當尋真名既受其法天地同根
呼覓招魄保命役神修之九年克登上仙夫受曲素
訣辭學上真之道當知五行父母真君內諱存以招
覓召以制鬼覓覓長存真神總歸宮宅備守形身便
得反於自知若此克遂遊宴玉清與炁合真矣

凡修此道當以甲乙之日入室燒香東向存思甲父
乙母二真之神父諱青嬰冠九玄碧寶玄冠衣翠羽
章衣手執青精保命祕符母諱浩先頭作頽雲之髻
著飛青錦帛手執化生丹霞符二人以玄符授我身

便叩齒九通呪曰

真君父母化生二靈三五反真與元合冥外攝遊魂
內固竄精長居宮宅無離我形長與三元同保玉清
畢服符又叩齒九通嚙液三過止修此九年洞觀無
窮徹視遠聞逆知吉凶

丙丁之日入室燒香南向存思丙父丁母二真之神
父諱樞戶冠朱陽通天寶冠衣絳章之衣手執朱明
保身長存祕符母諱納靈頭作飛雲之髻衣丹羅飛
翬手執中原黃精祕符來授我身便三呼二真內諱

咒曰

陰陽變化二景生真玉靈反覓拘梟鎮神三五混合
無離我身得保日月三景齊晨畢服符又叩齒九通
嚙炁三過止修此八年真靈降見雲輿來迎

戊巳之日入室燒香向西南存思戊父巳母二真之
神父諱長御冠黃華三寶玄冠衣黃章單衣手執中
元度命祕符母諱來生頭生二角顏雲髻著黃錦飛
翬手執金咒自然祕符來授我身便三呼二真內諱
咒曰